

## I. DISPOSICIÓN XERAIS

### MINISTERIO DE MEDIO AMBIENTE, E MEDIO RURAL E MARIÑO

- 19244** *Real decreto 1626/2011, do 14 de novembro, polo que se establecen a composición, estrutura e funcionamento do Consello da Auga da Demarcación Hidrográfica do Cantábrico Occidental e polo que se modifica o Real decreto 126/2007, do 2 de febreiro, polo que se regulan a composición, funcionamento e atribucións dos comités de autoridades competentes das demarcacións hidrográficas con bacías intercomunitarias.*

O artigo 26 do texto refundido da Lei de augas, aprobado polo Real decreto lexislativo 1/2001, do 20 de xullo, establece que entre os órganos de goberno, administración e cooperación do organismo de bacía, o Consello da Auga da demarcación é o órgano de participación e planificación.

No artigo 35 do mesmo texto refundido créase o Consello da Auga da demarcación para fomentar a información, consulta pública e participación activa na planificación hidrolóxica nas demarcacións hidrográficas con bacías intercomunitarias.

Pola súa vez, o artigo 36 do texto refundido dispón que a composición do Consello da Auga se estableza mediante real decreto, aprobado polo Consello de Ministros, e sinala os criterios aos cales a dita composición se deberá axustar.

O Consello da Auga da demarcación substitúe o Consello da Auga da bacía creado pola Lei 29/1985, do 2 de agosto, de augas, como órgano de planificación do organismo de bacía.

O Real decreto 29/2011, do 14 de xaneiro, polo que se modifican o Real decreto 125/2007, do 2 de febreiro, polo que se fixa o ámbito territorial das demarcacións hidrográficas, e o Real decreto 650/1987, do 8 de maio, polo que se definen os ámbitos territoriais dos organismos de bacía e dos plans hidrolóxicos, delimita unha Demarcación Hidrográfica do Cantábrico Occidental e unha parte española da Demarcación Hidrográfica do Cantábrico Oriental, e inclúe nesta última bacías intercomunitarias competencia do Estado e bacías internas do País Vasco, competencia desta comunidade autónoma.

Pola súa vez, define o ámbito territorial da Confederación Hidrográfica do Cantábrico, que comprende o ámbito territorial da zona terrestre da Demarcación Hidrográfica do Cantábrico Occidental, así como o da parte española da Demarcación Hidrográfica do Cantábrico Oriental, no ámbito de competencias do Estado.

Resulta, segundo isto, que, dentro do ámbito da Confederación Hidrográfica do Cantábrico existe unha demarcación hidrográfica –do Cantábrico Occidental– e unha parte competencia do Estado doutra demarcación hidrográfica –do Cantábrico Oriental–, que, por seren demarcacións hidrográficas diferentes, constitúen o ámbito de plans hidrolóxicos diferenciados.

Esta situación conduce á creación de dous consellos da auga, un para a Demarcación Hidrográfica do Cantábrico Occidental e outro para o ámbito competencia do Estado da parte española da Demarcación Hidrográfica do Cantábrico Oriental. Ambos os consellos constitúen órganos de planificación e participación da Confederación Hidrográfica do Cantábrico.

O obxecto deste real decreto é regular as funcións e atribucións e o réxime de funcionamento do Consello da Auga da Demarcación Hidrográfica do Cantábrico Occidental e establecer a súa composición, en aplicación do artigo 36 do texto refundido da Lei de augas.

A regulación do Consello da Auga, no texto refundido da Lei de augas, introduce significativas modificacións en relación coa Lei de augas de 1985 en canto ás funcións e

composición, incorporando entre as novas funcións a de promover a información, consulta e participación pública no proceso planificador, e entre os novos vogais, representantes das entidades locais, dos servizos periféricos de costas, autoridades portuarias e capitanías marítimas e de asociacións e organizacións en defensa de intereses ambientais, económicos e sociais relacionados coa auga.

En canto ao número e distribución dos representantes das comunidades autónomas no Consello, a nova regulación mantén as determinacións establecidas na antiga, debendo efectuarse en función do número de comunidades autónomas da demarcación e da superficie e poboación destas incluídas nela, cun mínimo dun representante por cada comunidade autónoma. Estes criterios aplicáronse considerando a superficie e a poboación con igual ponderación e tendo, pola súa vez, en conta que o número total de vogais do Consello non dificulte gravemente a súa operatividade.

No artigo 2 recólleñense como funcións e atribucións do Consello da Auga as que lle son atribuídas no texto refundido da Lei de augas, no Real decreto 606/2003, do 23 de maio, polo que se modifica o Regulamento do dominio público hidráulico, e no Real decreto 907/2007, do 6 de xullo, polo que se aproba o Regulamento de planificación hidrolóxica, así como outras atribucións que asignaban ao Consello da Auga da bacía o Real decreto 849/1986, do 11 de abril, polo que se aproba o Regulamento do dominio público hidráulico, e a Lei 10/2001, do 5 de xullo, do Plan Hidrolóxico Nacional.

A constitución efectiva do Consello require dun prazo para a elección e designación dos vogais, para o cal na disposición adicional primeira se establece un prazo de tres meses.

En definitiva, este real decreto adopta as decisións fundamentais mediante as cales se poida constituír o Consello da Auga da Demarcación Hidrográfica do Cantábrico Occidental, para así proceder ao cumprimento das funcións e atribucións que lle outorga o texto refundido da Lei de augas e demais normativa vixente, completándose o marco de planificación e participación co establecido no citado Real decreto 29/2011, do 14 de xaneiro, e nos acordos que se asinen para o seu desenvolvemento.

Por outra parte, a substitución da Demarcación Hidrográfica do Cantábrico polas dúas demarcacións antes citadas, realizada polo Real decreto 29/2011, do 14 de xaneiro, obriga a unha modificación do Comité de Autoridades Competentes definido naquela demarcación, para o cal se introduce no presente real decreto unha disposición derradeira en que se modifica o Real decreto 126/2007, do 2 de febreiro, polo que se regulan a composición, funcionamento e atribucións dos comités de autoridades competentes das demarcacións hidrográficas con bacías intercomunitarias.

Este real decreto recibiu o informe favorable do Pleno do Consello Nacional da Auga, no cal participan as comunidades autónomas e os sectores afectados.

Na súa virtude, por proposta da ministra de Medio Ambiente, e Medio Rural e Mariño, coa aprobación previa do ministro de Política Territorial e Administración Pública, de acordo co Consello de Estado e logo de deliberación do Consello de Ministros na súa reunión do día 11 de novembro de 2011,

**DISPOÑO:****Artigo 1. Obxecto.**

1. É obxecto deste real decreto a regulación da composición, estrutura e funcionamento e atribucións do Consello da Auga da Demarcación Hidrográfica do Cantábrico Occidental, conforme o previsto no artigo 36 do texto refundido da Lei de augas, aprobado polo Real decreto lexislativo 1/2001, do 20 de xullo.

2. Conforme o artigo 26.3 do texto refundido da Lei de augas, o Consello da Auga é o órgano de participación e planificación da Confederación Hidrográfica do Cantábrico.

Así mesmo, ten por obxecto a modificación do Real decreto 126/2007, do 2 de febreiro, polo que se regulan a composición, funcionamento e atribucións dos comités de autoridades competentes das demarcacións hidrográficas con bacías intercomunitarias.

**Artigo 2. Funcións do Consello.**

1. Corresponden, con carácter xeral, ao Consello da Auga as seguintes funcións:
  - a) Promover a información, consulta e participación pública no proceso planificador.
  - b) Elevar ao Goberno, a través do Ministerio de Medio Ambiente, e Medio Rural e Mariño o Plan Hidrolóxico da Demarcación Hidrográfica do Cantábrico Occidental e as súas ulteriores revisións.
  - c) Emitir informe sobre as cuestións de interese xeral para a demarcación.
  - d) Emitir informe sobre as cuestións relativas á protección das augas e á mellor ordenación, explotación e tutela do dominio público hidráulico ou as que lle sexan encomendadas polo presidente ou a Xunta de Goberno do organismo de bacía.
2. En relación co proceso de planificación hidrolólica, serán así mesmo funcións específicas do Consello da Auga:
  - a) Emitir informe sobre a proposta da Xunta de Goberno de proceder á revisión do Plan Hidrolóxico da Demarcación Hidrográfica do Cantábrico Occidental.
  - b) Emitir informe preceptivo sobre o esquema provisional de temas importantes en materia de xestión de augas previsto no artigo 79.6 do Regulamento de planificación hidrolólica aprobado polo Real decreto 907/2007, do 6 de xullo.
  - c) Emitir informe preceptivo sobre a proposta de proxecto de Plan Hidrolóxico da Demarcación Hidrográfica do Cantábrico Occidental e as súas ulteriores revisións con carácter previo ao seu envío ao Goberno para a súa aprobación.
  - d) Emitir informe sobre os plans especiais de actuación en situacións de alerta e eventual seca con carácter previo á súa aprobación.
3. Serán, así mesmo, funcións e atribucións do Consello da Auga as seguintes:
  - a) Ser informado e oído previamente á declaración de sobreexplotación ou risco de sobreexplotación dos recursos hidráulicos nunha zona, con carácter previo á súa aprobación pola Xunta de Goberno, e emitir informe sobre o estudo relativo á situación do acuífero que está en proceso de ser declarado sobreexplotado ou en risco de estallo. Así mesmo, emitirá informe sobre o plan de ordenación de extraccións elaborado tras a declaración de sobreexplotación.
  - b) Emitir informe sobre a delimitación dos perímetros de protección de acuíferos, con carácter previo á súa aprobación pola Xunta de Goberno.
  - c) Emitir informe sobre a determinación dos perímetros de acuíferos dentro dos cales non será posible o outorgamento de novas concesións de augas subterráneas, con carácter previo á súa aprobación.
  - d) Emitir informe sobre a revogación das autorizacións de vertedura de augas residuais ao dominio público hidráulico, con carácter previo á súa resolución.
  - e) Emitir informe acerca das modificacións sobre a largura das zonas de servidume e de policía do dominio público hidráulico, con carácter previo á súa aprobación pola Xunta de Goberno.
  - f) Calquera outra que lle veña legalmente atribuída.

**Artigo 3. Estrutura.**

1. O Consello da Auga poderá actuar en pleno e en comisións.
2. O Pleno poderá acordar a constitución de comisións específicas para o estudo e informe dos asuntos que aquel decida encomendarlle.
3. Existirá, en todo caso, unha Comisión de Planificación Hidrolólica e Participación Cidadá para o estudo e informe dos asuntos que o pleno decida encomendarlle en relación coa planificación hidrolólica e coa participación cidadá, cuxa composición se establece no artigo 7 deste real decreto.

**Artigo 4. Composición do Pleno.**

1. O Consello da Auga da Demarcación Hidrográfica do Cantábrico Occidental estará constituído polo presidente, dous vicepresidentes, un secretario e os vogais que se concretan no artigo seguinte.
2. Será presidente do Consello o do organismo de bacía. En caso de vacante, ausencia, enfermidade ou outra causa legal, será substituído polo comisario de Augas da Confederación Hidrográfica do Cantábrico.
3. A Vicepresidencia Primeira corresponderá ao vogal que resulte elixido por e entre os que representen as comunidades autónomas. A Vicepresidencia Segunda recaerá sobre o vogal que resulte elixido por e entre os vogais representantes dos usuarios. En ambas as situacións o cesamento como vogal implicará, en todo caso, o cesamento como vicepresidente.
4. Como secretario do Consello, con voz pero sen voto, actuará o secretario xeral do organismo de bacía. En caso de vacante, enfermidade ou outra causa legal, será substituído por un funcionario do organismo de bacía designado polo presidente.
5. Para cada un dos vogais do Consello poderase designar un suplente.

**Artigo 5. Distribución de vogais.**

En función dos criterios que establece o artigo 36.1 do texto refundido da Lei de augas, serán vogais do Consello da Auga:

- a) En representación dos departamentos ministeriais relacionados coa xestión das augas e o uso dos recursos hidráulicos, os seguintes vogais: Medio Ambiente e Medio Rural e Mariño, tres vogais; Industria, Turismo e Comercio, dous vogais; Fomento, dous vogais; Economía e Facenda, un vogal; Sanidade, Política Social e Igualdade, un vogal; Defensa, un vogal; Interior, dous vogais; Política Territorial e Administración Pública, un vogal e Ciencia e Innovación, un vogal.
- b) En representación dos servizos técnicos do organismo de bacía, o comisario de Augas, o director técnico e o xefe da Oficina de Planificación Hidrolóxica; das unidades periféricas de Asturias, Cantabria e Galicia, da Dirección Xeral de Sustentabilidade da Costa e o Mar, do Ministerio de Medio Ambiente, e Medio Rural e Mariño, un vogal por cada unha; das capitánías marítimas de Avilés, Gijón e Santander, un vogal por cada unha e das autoridades portuarias de Avilés, Gijón e Santander, un vogal por cada unha.
- c) En representación das comunidades autónomas, os seguintes vogais: Principado de Asturias, oito vogais; Cantabria, catro vogais; País Vasco, 1 vogal; Castilla y León, un vogal e Galicia, un vogal.
- d) En representación das entidades locais cuxo territorio coincide total ou parcialmente co da demarcación, tres vogais.
- e) En representación dos usuarios, vinte e cinco vogais.
- f) En representación das asociacións e organizacións de defensa de intereses ambientais, económicos e sociais relacionadas coa auga, os seguintes vogais: asociacións agrarias, dous vogais; asociacións ecoloxistas, dous vogais; asociacións empresariais, un vogal e organizacións sindicais, un vogal.

**Artigo 6. Designación dos vogais.**

A designación de vogais do Consello da Auga efectuarase do modo seguinte:

- a) Os vogais en representación dos departamentos ministeriais, das unidades periféricas de costas, capitánías marítimas e autoridades portuarias serán designados polo ministerio correspondente.
- b) Os vogais en representación das comunidades autónomas serán designados polo órgano autonómico competente para o efecto.
- c) Os vogais en representación das entidades locais serán designados pola Federación Española de Municipios e Provincias, por un período de tres anos.

- d) Os vogais en representación dos usuarios serán elixidos, por un período de tres anos, entre os membros pertencentes ao ámbito da demarcación da asemblea de usuarios do organismo de bacía, polos representantes desta de cada unha das clases de aproveitamentos, respectando a proporcionalidade que existe na asemblea.
- e) Os vogais en representación das asociacións e organizacións de defensa de intereses ambientais, económicos e sociais serán designados por un período de tres anos, pola ministra de Medio Ambiente, e Medio Rural e Mariño, por proposta das asociacións e organizacións con maior implantación ou máis representativas na demarcación hidrográfica.
- f) Os suplentes serán designados na mesma forma que o titular.

**Artigo 7. Composición da Comisión de Planificación Hidrolóxica e Participación Cidadá.**

1. A Comisión de Planificación Hidrolóxica e Participación Cidadá estará presidida polo presidente do Consello da Auga e integrada por vogais do dito Consello, na seguinte forma: tres representantes do Ministerio de Medio Ambiente, e Medio Rural e Mariño, un representante do Ministerio de Fomento, un representante do Ministerio de Política Territorial e Administración Pública, un representante do Ministerio de Industria, Turismo e Comercio e un representante do Ministerio de Ciencia e Innovación; polas comunidades autónomas, os seguintes representantes: catro polo Principado de Asturias, dous por Cantabria, un por Castilla y León, un por Galicia e un polo País Vasco; doce representantes dos usuarios, debendo estar representados sempre os usos de abastecemento, regadíos, usos industriais non enerxéticos e usos enerxéticos; dous representantes das entidades locais cuxo territorio coincide total ou parcialmente co da demarcación e tres representantes das asociacións e organizacións de defensa de intereses ambientais, económicos e sociais relacionados coa auga, distribuídos da seguinte maneira: un representando os intereses ambientais, un os económicos e un os sociais.

2. A elección do representante de cada grupo farase entre os seus membros e por un período de tres anos; en caso de empate ou de non chegar a acordo resolverá o presidente do Consello. Ademais, integraranse nas comisións o comisario de Augas, o director técnico e o xefe da Oficina de Planificación Hidrolóxica do organismo de bacía. Como secretario das comisións actuará o xefe da Oficina de Planificación Hidrolóxica.

**Artigo 8. Réxime de funcionamento.**

1. O Consello da Auga poderá elaborar un regulamento de réxime interior que regule o seu funcionamento, que deberá ser aprobado polo Pleno.

2. Sen prexuízo das peculiaridades previstas neste real decreto, o Consello axustará o seu funcionamento ao disposto no capítulo II do título II da Lei 30/1992, do 26 de novembro, de réxime xurídico das administracións públicas e do procedemento administrativo común, para o funcionamento dos órganos colexiados.

3. O Pleno do Consello reunirase cando o considere necesario o presidente e, en todo caso, polo menos unha vez ao ano.

4. Non obstante o previsto no punto anterior, o presidente poderá someter un asunto determinado á consideración do Consello solicitando as observacións dos seus membros á cuestión mediante procedemento escrito, sen necesidade de realización do Pleno do Consello ou das súas comisións, por razóns de urxencia. Non se poderá utilizar este procedemento cando se trate da discusión e informe do Plan Hidrolóxico da Demarcación, salvo que xa se debatese con anterioridade en Pleno ou supoña modificacións non relevantes. Unha vez iniciado o dito procedemento, o Pleno do Consello ou as súas comisións deberán pronunciarse nun prazo non superior a un mes e transcorrido este prazo, entenderase substanciado o mencionado trámite.

5. Ás sesións das comisións do Consello da Auga poderán asistir, cando así o acorde o presidente do Consello, funcionários do organismo de bacía ou das administracións autonómicas implicadas, así como representantes das organizacións agrarias e de usuarios non concesionais ou outras persoas de recoñecido prestixio e

experiencia en materia de augas, con voz pero sen voto, cuxa asistencia será voluntaria e sen ningunha remuneración.

6. Os asuntos que se teñan que someter ao Consello da Auga serán preparados pola Xunta de Goberno do organismo de bacía.

7. En casos de ausencia ou de enfermidade e, en xeral, cando concorra alguma causa xustificada, as organizacións representativas de intereses sociais e demais membros do Consello poderán substituír os seus membros titulares por outros, acreditándoo ante a Secretaría do Consello.

**Artigo 9. Órganos de apoio.**

O órgano de apoio técnico do Consello da Auga da Demarcación Hidrográfica do Cantábrico Occidental será a Oficina de Planificación Hidrolóxica da Confederación Hidrográfica do Cantábrico.

**Disposición adicional primeira. Constitución do Consello da Auga da Demarcación Hidrográfica do Cantábrico Occidental**

O Ministerio de Medio Ambiente, e Medio Rural e Mariño, a través da Confederación Hidrográfica do Cantábrico, levará a cabo as actuacións necesarias para que o Consello da Auga da Demarcación Hidrográfica do Cantábrico Occidental se constitúa no prazo de tres meses a partir da entrada en vigor deste real decreto.

**Disposición adicional segunda. Constitución da Comisión de Planificación Hidrolóxica e Participación Cidadá.**

Tras a constitución do Consello, a Comisión de Planificación Hidrolóxica e Participación Cidadá deberá constituírse nun prazo non superior a un mes.

**Disposición adicional terceira. Réxime económico.**

A constitución e funcionamento de Consello da Auga da demarcación regulado neste real decreto non suporá ningún incremento do gasto público e atenderase cos recursos persoais e materiais existentes na Confederación Hidrográfica do Cantábrico.

**Disposición transitoria única. Consello da Auga da bacía.**

Mentres non estea constituído o Consello da Auga da Demarcación Hidrográfica do Cantábrico Occidental, continuarán existindo e exercendo as súas propias funcións o Consello da Auga da bacía.

**Disposición derogatoria única. Derrogación normativa.**

Quedan derogadas cantas disposicións de igual ou inferior rango se opoñan ao disposto neste real decreto e, en particular, o disposto no artigo 4.2 do Real decreto 266/2008, do 22 de febreiro, polo que se modifica a Confederación Hidrográfica do Norte e se divide na Confederación Hidrográfica do Miño-Sil e na Confederación Hidrográfica do Cantábrico.

**Disposición derradeira primeira. Modificación do Real decreto 126/2007, do 2 de febreiro, polo que se regulan a composición, funcionamento e atribucións dos comités de autoridades competentes das demarcacións hidrográficas con bacías intercomunitarias.**

O Real decreto 126/2007, do 2 de febreiro, queda modificado como segue:

Un. Engádese unha alínea d) ao punto 1 do artigo 4 coa seguinte redacción:

«d) Demarcación Hidrográfica do Cantábrico Occidental. En representación da Administración xeral do Estado, dous vogais do Ministerio de Medio Ambiente, e

Medio Rural e Mariño e tres vogais representando os restantes departamentos ministeriais. En representación das comunidades autónomas, un vocal por cada unha das citadas a continuación: Principado de Asturias, Cantabria, Castilla y León, Galicia e País Vasco. En representación das entidades locais, dous vogais.»

Dous. Modifícase a alínea b) do punto 2 do artigo 4 do seguinte modo:

«b) Parte española da Demarcación Hidrográfica do Cantábrico Oriental, no ámbito de competencias do Estado. En representación da Administración xeral do Estado, un vocal do Ministerio de Medio Ambiente, e Medio Rural e Mariño e dous vogais representando os restantes departamentos ministeriais. En representación das comunidades autónomas, un vocal por cada unha das citadas a continuación: País Vasco, Castilla y León e Navarra. En representación das entidades locais, un vocal.»

Disposición derradeira segunda. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 14 de novembro de 2011.

JUAN CARLOS R.

A ministra de Medio Ambiente,  
e Medio Rural e Mariño,  
ROSA AGUILAR RIVERO